

JAARVERSLAG VAN DIE PRESIDENT – WONDERBOOM ROLBALKLUB – 2011/ 2012

INLEIDING

Aan die einde van my tweede jaar as President doen ek graag verslag oor die afgelope termyn se aktiwiteite van Wonderboom Rolbalklub. Ek dek in my verslag die aktiwiteite van die bestuur, vordering met belangrike prioriteite wat geïdentifiseer is en prestasies wat deur die lede van die klub behaal is. Die doel van die verslag is om 'n objektiewe beeld van die klub se aktiwiteite opsommend weer te gee.

BEPLANNING

Die oogmerk van die Uitvoerende Bestuur vanjaar was om verder uitvoering te gee aan die bereiking van die visie van die klub, wat tydens die vorige termyn soos volg geformuleer is:

“Wonderboom Rolbalklub is die klub van keuse vir mense wat 'n passie vir die spel het. By Wonderboom word rolbal kompetend en sosiaal gespeel vir die pure genot daarvan.”

Ek doen graag soos volg verslag oor die vordering wat met die geïdentifiseerde prioriteite gemaak is:

1. Die eerste oogmerk was om die ledetal van die klub te verhoog na 180 teen die einde van 2013, met ten minste 50% van die lede wat gewerf word jonger as 50.

Nie minder nie as 28 nuwe lede het die afgelope termyn by die klub aangesluit. Dit is nie alleen 'n aanduiding dat daar belangstelling in rolbal as 'n sport is nie, maar ook dat Wonderboom bekend is in die gemeenskap as 'n goeie klub om aan te behoort. Daarvoor moet veral die lede van die klub wat die goeie beeld van die klub uitdra, bedank word. Ongelukkig het 27 lede in dieselfde tydperk bedank, wat die ledetal aan die einde van die termyn op 163 te staan bring. Die bedankings is hoofsaaklik te wyte aan gesondheidsredes en verhuisings uit die omgewing. Daar was egter ook enkele gevalle van lede wat bedank het omdat hulle nie tuis gevoel het by die klub nie. Die oogmerk om teen die ledetal na 180 op te stoot teen die einde van 2013 is moeilik om te bereik maar behoort steeds nagejaag te word.

Tewyl dit verblydend is daar tans 5 junior lede, dws skoolgaande lede, by die klub is, is dit jammer dat net 10% van die lede jonger as 50 is. Die gemiddelde ouderdom van al die lede is 64. Die werf van jonger lede is veral iets waaraan meer aandag gegee moet word in die toekoms.

2. Tweedens het die bestuur hom ten doel gestel om 'n finansiële plan gereed te hê vir ingeval die plaaslike owerheid sy ondersteuning van die klub staak of verminder. Ten spyte van 'n versekering deur Tshwane Munisipaliteit dat hy nie sy ondersteuning sal verminder nie, is daar 'n moontlikheid dat klubs voortaan self die koste van die jaarlikse herstel van perke sal moet dra. Hierdie aangeleentheid sal verder toegelig word tydens die bespreking van die begroting.

Ook kommerwekkend is dat die huurgeld vir die terrein met 42% gestyg het. 'n Detail ontleding het getoon dat indien die plaaslike owerheid alle ondersteuning sou staak, die klubfooie minstens verdubbel sal moet word om die klub se voortbestaan te verseker.

3. In die derde plek was dit 'n oogmerk van die bestuur om te voldoen aan die lede se behoefte vir sosiale aktiwiteite. Die klub se lede is seker in die beste posisie om te besluit of hierdie oogmerk bereik is. Die geleentheid wat wel gereel is en goed ondersteun is, is die Valentynsdag viering, bring-en-braai geleentheid na spel en sosiale samesyn in die kroeg na spel. Die maandelikse byeenkomste wat die enkellopendes self reel, voldoen ook aan 'n belangrike sosiale behoefte. Lede word aangemoedig om 'n aanduiding aan die bestuur gee van watter behoeftes daar nog bestaan.
4. Die vierde oogmerk was om meer spelers aan te moedig en toe te rus om kompetender te speel deur voldoende geleentheid te bied vir lede om hul vaardighede te verbeter. Hierin is deels geslaag. Die klub se afrigters het uitstekend presteer deur goeie afrigting te voorsien aan die groot aantal beginners wat aangesluit het. Die geleentheid wat aan die meer ervare lede gebied word om hul vaardighede verder te verbeter word egter nie goed ondersteun nie. Dit is ook opmerklik dat die getal inskrywings vir BGN en ander eksterne kompetisies besig is om af te neem, veral wat manslede betref.

Tot sover die verslag oor die vier strategiese oogmerke. Die nuwe bestuur sal besluit of daar 'n aanpassing in die klub se fokus voorsien word en u mettertyd daaroor inlig.

Wat betref die ander aktiwiteite van die klub doen ek graag soos volg verslag:

Prestasies van die klub

Wonderboom Rolbalklub het weer eens puik presteer en slegs die hoogtepunte word hier genoem. Ons is baie trots op ons dames wat so goed presteer het tydens die SA Nasionale Kampioenskap, nl. Babs Channer, Marsha Potgieter, Rea Potgieter en Manda Stroebel wat 'n bronsmedalje verwerf het vir die dames vierspel en Babs Channer wat ook 'n bronsmedalje verwerf het in die senior dames enkels. Verskeie van ons lede, dames asook mans het BGN verteenwoordig. Rea Potgieter het die BGN Dames Meesterskampioenskap gewen en was gekies om aan die BSA se Meestersbyeenkoms deel te neem. Ons het ook enkele dae gelede verneem dat Rea gekies is om vir 'n Proteaspan teen Maleisië te speel in September. Nic Laage is die BGN senior mans enkelskampioen vir die tweede keer in drie jaar en was ook lid van 'n interklub span wat die BGN senior mans driespel kampioenskap gewen het. Wat die BGN Liga betref het beide die dames- en mans eerstespanne derde geëindig in die BGN Eerste Divisie. Dit is 'n goeie prestasie as die hoë standard van ligaspeel in Gauteng Noord in ag geneem word. 'n Groot hoogtepunt was die eerste plek wat ons dames derdespan behaal het in die BGN Derde Divisie. Die

dames vierdespan het tweede geëindig in die BGN Vierde Divisie. Dit is opmerklik dat ons damesspanne heelwat beter presteer het in die ligas as die mansspanne.

‘n Groot hoogtepunt was die viering van die klub se dertigste bestaansjaar tydens ‘n spogfunksie in Oktober 2011. Hulde is gebring aan die stigters van die klub en lede wat oor die jare bygedra het tot die sukses van die klub.

Fasiliteite en organisasie

Ons fasiliteite is goed instand gehou en is dikwels deur BGN gebruik vir toernooie en kompetisies. Ek wil graag vir Fred Bartlett bedank vir sy toewyding en harde werk om ons perke in so ‘n goeie toestand te hou. Ons kroegpersoneel het hulle werk met groot toewyding gedoen en Jean Entres en sy personeel verdien ons almal se waardering vir die puik diens wat hulle lewer. Dank ook aan ons Tegniese Beamptes wat wat weer eens hulle plek volgestaan het en altyd beskikbaar en gewillig gewees het wanneer ons hulle nodig gehad het. Die spelreëlingskomitee onder leiding van Gerhard Terblanche het weer uitstekende diens gelewer en verseker dat sosiale spel op ‘n goedgeorganiseerde wyse plaas gevind het. Verskeie lede het gehelp wanneer daar werk aan ons fasiliteite gedoen moes word en het gereeld gehelp met voorbereiding van bane vir spel, opruiming na spel en bediening van tee. Dankie ook aan hulle. Our two competition secretaries, Marna Bartlett and Stephen Attwood did a splendid job to complete a very busy competition schedule in time. Stephen, thank you for accepting and completing this task despite your sometimes difficult personal circumstances. Marna, dankie ook vir die bekwame wyse waarop jy hierdie moeilike taak hanteer het.

Dan wil ek graag baie dankie sê aan ons dames- en manskeurders. Om ‘n keurder te wees is nie maklik nie en keurders kan nie altyd almal tevrede stel nie. U kan egter verseker wees dat die keurders vanjaar hulle werk na die beste van hulle vermoë gedoen het en as komitees goed gefunksioneer het.

Laastens, dankie aan Tommie Marais vir die entoesiastiese wyse waarop hy die Dinsdagklub gelei het. Ek is baie dankbaar dat hy bereid is om met hierdie belangrike taak voort te gaan.

Borgdae en Borge

- **Die Allen Joss Meerhof dag** was weer eens ‘n groot sukses. Dit is ons jaarlikse geleentheid om ‘n bydrae te maak ter ondersteuning van die gemeenskap. Met die donasies wat ons van Allen Joss en van ‘n paar klublede ontvang het, kon ons ‘n goeie donasie van kontant, klere en toiletware skenk aan Meerhof Skool.
- ‘n Baie geslaagde **Warwick borgdag** is gehou en ‘n hele aantal spanne van ander klubs het ingeskryf.
- **Wonderboom teen Pretoria Noord.** Die kompetisie het vanjaar by ons klub plaasgevind en die baie goeie spel van ons spanne het verseker dat die trofee vanjaar by ons staan
- **Die jaarlikse kompetisie teen Vriendekring** is reeds gereël en vind op 11 Augustus plaas.

- **Die Dinsdagklub** se borgdae die eerste Dinsdag van die maand is goed ondersteun en het weer gesorg vir goeie rolbal.
- **Ander Borge:** Behalwe vir Allen Joss en Warwick wat reeds genoem is bedank ons ook die volgende borge: Tommie Marais, Robbie Fox, Gerrie Cloete, Janna Botha, Pretoriase Oorinstituut en verskeie ander instansies en klublede wat kleiner donasies gemaak het.

Die Uitvoerende Bestuur:

Dit is met trots en dank dat ek kan rapporteer dat die Uitvoerende Bestuur wat u verlede jaar gekies het, hulle taak toegewyd, entoesiasies en met uitstaande spanwerk verrig het. Ek wil graag vir die twee Vise-Presidente, Rea en Cran bedank dat hulle my taak makliker gemaak het. Julle is twee staatmakers en die klub kan dankbaar wees vir sulke toegewyde lede. Ons Sekretaris, Elbert, het sy taak nougeset uitgevoer en daarvoor gesorg dat die klub se administrasie in 'n puik toestand is. Dankie aan Joey wat bereid was om die moeilike taak van Tesourier te aanvaar en vir die noukeurige wyse waarop sy die finansies van die klub hanteer het. Die vier addisionele lede, Bella, Nancy, Piet en Jannie, dankie ook vir julle ondersteuning en die gewilligheid waarmee julle die take wat aan julle opgedra is, uitgevoer het. Ander klublede wat nie op die Uitvoerende Bestuur gedien het nie, maar wat belangrike ondersteunende rolle gespeel het, is Clare Prinsloo wat vir Joey in haar taak gehelp het deur die klub se boeke te doen, Gerhard Terblanche wat die administrasie van nuwe aansoekers hanteer het en die ledelys op datum gehou het en laastens Rudolph Kilian wat die administrasie van BGN kompetisies vir die grootste deel van die jaar gedoen het. Julle hulp het die Bestuur se taak baie ligter gemaak.

Ten slotte:

My dank aan elke lid van die klub vir die ondersteuning wat ek die afgelope twee jaar as President ontvang het. Ek herhaal wat ek verlede jaar gesê het: Wonderboom Rolbalklub het 'n besondere karakter en kultuur en dit is te danke aan die lede van ons klub.

Vir my was dit 'n besondere voorreg om President van hierdie klub te wees. Ek is dankbaar vir die geleentheid wat u as lede vir my gebied het en die eer wat u my aangedoen het om my as President te verkies.

Die nuwe Uitvoerende Bestuur wat vandag aangewys word het baie jare se ondervinding as spelers en ook in rolbaladministrasie. Ek wil hulle graag sterkte toewens en ek is seker dat hulle hierdie klub tot verdere hoogtes sal lei. My wens is dat u hulle ten volle sal ondersteun in die taak wat vir hulle voorlê.

Piet Stroebel

President.